

Inatsisartut aalajangiiffigisassaattut siunnersuut, Inatsisartut Siulittaasoqarfiat peqquneqassasoq siunnersuummik saqqummiussissasoq, Naalakkersuinikkut partiit ingerlatsisut naatsorsuutaasa tamanut saqqummiunneqartarnerat pillugit Inatsisartut Inatsisaat allanngortinneqarnissaannik taamaasilluni partiimut 10.000 kr. sinnerlugu aningaasaliissuteqarsimanermi partiip naatsorsuutaanni kina aningaasaliissuteqarsimansoq taamaallaat allaqqanani, kisiannili aamma aningaasaliissutit qanoq annertutigineri aamma allaqqasalerluni. Aningaasaliissutigineqarsinnaasullu killissarititaa avaqqunneqarsinnaassanngilattaq inatsisitigut pisussaatisaasunit arlaliusunit avinneqarsimalluni

pillugu

Inatsisinut Ataatsimiititaliap

siunnersuutip aappassaaneerpeqarneranut

ISUMALIUTISSIISUTAA

Ataatsimiititaliap suliarinninnermini ilaasortarai:

Inatsisartunut ilaasortaq Anders Olsen, Siumut, siulittaasoq
Inatsisartunut ilaasortaq Aqqalu Jerimiassen, Atassut, siulittaasup tullia
Inatsisartunut ilaasortaq Harald Bianco, Inuit Ataqtigiit
Inatsisartunut ilaasortaq Mariia Simonsen, Inuit Ataqtigiit
Inatsisartunut ilaasortaq Mala Høy Kúko, Siumut

Ulloq 10. maaji 2022-mi siullermeerinninnerup kingorna ataatsimiititaliap siunnersuut misissorpaa.

Siunnersuutip imarisaa siunertaalu

Naalakkersuinikkut ingerlatsisut partiit naatsorsuutaasa tamanut saqqummiunneqartarneri pillugit Inatsisartut inatsisaannut allannguutissatut siunnersuummik saqqummiussinissamat Inatsisartut Siulittaasoqarfiat siunnersuutikkut peqquneqassaaq, taamaalillunilu partiimut 10.000 kr. sinnerlugit tapiissuteqarnermi kina tapiissuteqarsimansoq partiip naatsorsuutaani kisimi allasimasarunnaarluni qanoq amerlatigisunik tapiissuteqartoqarsimansoq aamma

allaqqasalissalluni. Aammattaaq aningaasanut killiliussap inatsisitigut pisussaatitaasunut arlalinnut aggulunneratigut killiliussamik saneqqussiniarneq periarfissaassanngilaq.

Ataatsimiititaliap siunnersuummik suliarinninnera

Naalackersuinikkut ingerlatsisut partiit naatsorsuutaasa tamanut saqqummiunneqartarneri pillugit malittarisassat atuuttut malillugit, ukiumi naatsorsuusiorfiusumi inummiit ataatsimiit ataasiarluni arlaleriarluniluunniit katillugu 10.000 kr. sinnerlugit partii tapiiffigineqarsimaguni, ukiumoortumik naatsorsuutini aningaasaliisup aqqa najugaalu nalunaarutigissallugit pisussaatitaavoq. Kiisalu kinaassutsimik taasinatik 10.000 kr. sinnerlugu tapiisoqarsimatillugu, tapiissutit tamarmiusut amerlassusaat aammalu tapiissutit ataasiakkaat amerlassusaat pillugit paasissutissat ukiumoortumik naatsorsuutininut ilanngunneqassapput. Maanna partiit ukiumoortumik naatsorsuutaanni kinaassutsimik isertuussinatik tapiisimasut tunissutaasa annertussusaat takuneqarsinnaanngillat.

Tamatuma saniatigut tapiissutit inatsisitigut pisussaatitaasunut arlalinnut aggulunnerisigut tapiissutigineqartunik tamanut saqqummiussisussaatitaaneq inatsisitigut pisussaatitaasunit saneqqunneqarsinnaavoq.

Assersuut: suliffeqarfissuup iluani suliffeqarfeeqqat pingasut tamarmik 9.999 kr.-nik tunniussaqaarsinnaapput. Taamaalillunilu suliffeqarfissuarmiit ataatsimiit katillugu 30.000 kr. missaannik tunissuteqartoqarluni. Partiip ukiumoortumik naatsorsuutaanni suliffeqarfeeqqat suliffeqarfissuarluunniit tunissuteqarsimasutut nalunaarsorneqarnaviannngillat, pissutigalugu tapiissutaat ataasiakkaarlutik 10.000 kr. ataakkamikku – aamma piginnittulluunniit taakkuugaluarpata – taakku suliffeqarfissuarmik piginnittuusut.

10.000 kr. sinnerlugu tunniussisoqarsimatillugu tunniussap annertussusaata aamma suminngaanneernerata tamanut saqqummiunneqartarnissaanut pisussaatitsilernissaq siunnersuuteqartumit anguniarneqarpoq.


Tamatuma saniatigut tapiissutit inatsisitigut pisussaatitaasunut arlalinnut aggulunnerisigut aningaasanut killiliussamik inatsisitigut pisussaatitaasut saneqqutsisinnaajunnaarnissaat siunnersuummut ilaatinneqarpoq. Siunnersuuteqartup siunnersuummut tunngavilersuummini taasaatut tamanna assigiinngitsutigut piviusunngortinneqarsinnaavoq. Inatsisitigut pinsinnaatitaallutik arlaliusunit tapiissutit inummit ataatsimit pigineqarnersut/aqunneqarnersut nakkutigissallugu unammillernassasoq, oqaatigissallugu ataatsimiititaliap tunngavissaqaarsora. Inatsisitigut pinsinnaatitaasut, assersuutigalugu ingerlatseqatigiiffiit kattuffiillu, tapiisimatillugit tapiissuteqartut aningaasallu amerlassusaat pillugit paasissutissat pinerit tamaasa partiit naatsorsuutaanni ilanngunneqartarnissaannik piumasaqaammik atuutsitsisoqalerpat, tamanna tapiissutit ammasuunissaannik siunnersuummi anguniakkap allaffissornerup annertusineranik nassataqanngikkaluartumik piviusunngortinneranik nassataqassaaq.

Inunnut suliffeqarfimmut attuumassuteqaratik tunniussisunut tunngatillugu, nammineq inuuneqarnerannik politikikkullu isumaqarnerannik illersuinissaq eqqarsaatigalugu, annertuallaanngitsunik tunniussaqtut aqqi ilanngullugit tamanut saqqummiunneqartassanngitsut ataatsimiititaliap erseqqissarusuppaa.

Ataatsimiititaliap inassuteqaatai

Ataatsimiititaliap isumaqatigiittup siunnersuutip akuersussutigineqarnissaa inassutigaa.


Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.



Anders Olsen
Siulittaasoq



Aqqalu Jerimiassen
Siulittaasup tullia



Harald Bianco



Maria Simonsen



Mala Høy Kúko